



SIARAN AKHBAR
KEMENTERIAN KEWANGAN DAN EKONOMI

**MESYUARAT MENTERI KEWANGAN ASEAN KE-12 DAN GABENUR BANK PUSAT
(12th AFMGM) DAN MESYUARAT-MESYUARAT BERKAITAN
7 – 10 April 2025
Kuala Lumpur, Malaysia**



Gambar daripada: Kementerian Kewangan Malaysia

1. Yang Berhormat Dato Seri Setia Dr. Haji Mohd Amin Liew bin Abdullah, Menteri di Jabatan Perdana Menteri dan Menteri Kewangan dan Ekonomi II Negara Brunei Darussalam telah menghadiri Mesyuarat 12th AFMGM dan Mesyuarat-Mesyuarat Berkaitan yang telah diadakan pada 7 hingga 10 April 2025 di Kuala Lumpur, Malaysia. Turut hadir pada Mesyuarat-Mesyuarat tersebut adalah Yang Mulia Hajah Rashidah binti Haji Sabtu, Pengarah Urusan Brunei Darussalam Central Bank (BDCB).

Mesyuarat 12th AFMGM dan Mesyuarat-Mesyuarat Berkaitan

2. Mesyuarat-Mesyuarat tersebut bermula dengan dialog di antara Menteri-Menteri Kewangan ASEAN dan wakil-wakil serta Gabenor-Gabenur Bank Pusat ASEAN dengan Majlis Penasihat Perniagaan ASEAN (ASEAN-BAC), Majlis Perniagaan ASEAN – Kesatuan Eropah (EU-ABC) dan Majlis Perniagaan ASEAN – Amerika Syarikat (US-ABC). Dialog-dialog tersebut memberi tumpuan kepada kemajuan kerjasama di antara pihak awam dan swasta berikutan cabaran geo-ekonomi, antara lain melalui memacu

kemampuan, meluaskan kesalinghubungan dan memanfaatkan transformasi digital di ASEAN untuk pertumbuhan jangka panjang rantau ini.

3. Menteri-Menteri Kewangan dan Gabenor-Gabenor Bank Pusat ASEAN, serta wakil-wakil juga menyertai Sesi Dialog dengan Institusi Kewangan Antarabangsa (IFI) termasuk *International Monetary Fund*, *World Bank*, *Asian Development Bank* dan *Centre of Economic Policy Research*. Perkembangan mengenai tinjauan global dan serantau dibentangkan untuk mewujudkan konteks bagi Menteri-Menteri Kewangan dan Gabenor-Gabenor Bank Pusat ASEAN untuk membincangkan dan bertukar pandangan mengenai perkembangan dasar perdagangan terkini dalam membentuk rantau ASEAN yang lebih kukuh dan berdaya tahan.
4. Semasa Mesyuarat Menteri-Menteri Kewangan ASEAN ke-29, para Menteri membincangkan cara-cara untuk meningkatkan kerjasama Kewangan ASEAN dalam beberapa bidang termasuk kastam, percukaian, insurans, pembiayaan infrastruktur, perbendaharaan dan pengurusan kewangan awam. Para Menteri juga menekankan kepentingan menyelaraskan penglibatan merentas sektor dalam kerjasama ASEAN bagi menangani isu-isu merentas bidang mengenai tenaga, bencana, kesihatan dan keselamatan makanan.
5. Mesyuarat AFMGM ke-12 menyatakan sokongan terhadap keutamaan Pengerusi ASEAN Malaysia 2025, di bawah tema "*Inclusivity and Sustainability*". Mesyuarat juga bertukar pandangan mengenai pengukuhan kerjasama dalam integrasi monetari dan kewangan serantau, serta dalam kewangan mampan.
6. Semasa Mesyuarat-Mesyuarat tersebut, Yang Berhormat Dato Seri Setia Dr. Haji Mohd Amin Liew bin Abdullah, antara lain, telah:
 - i. Mengalu-alukan visi Malaysia untuk memperkukuh Komuniti ASEAN melalui tema "*Inclusivity and Sustainability*", yang bertepatan dengan aspirasi bersama ASEAN untuk rantau yang berdaya tahan dan makmur;
 - ii. Menegaskan kepentingan hubungan ekonomi dan perdagangan yang kukuh dalam menangani cabaran global dan menekankan sokongan Negara Brunei Darussalam dalam bekerjasama dengan Malaysia dan Negara-Negara Ahli ASEAN yang lain dalam memajukan keutamaan ekonomi bersama, mengurangkan impak kejutan luaran dan merealisasikan visi bersama ASEAN dalam membina Masyarakat ASEAN yang makmur, berdaya tahan dan saling terhubung; dan
 - iii. Menekankan pembangunan rangka kerja kewangan mampan adalah penting untuk menarik pembiayaan iklim dan memacu pelaburan mampan ke arah membina rantau ASEAN yang lebih berdaya tahan.
7. Kenyataan Bersama Mesyuarat Menteri-Menteri Kewangan dan Gabenor-Gabenor Bank Pusat ASEAN ke-12 yang telah dikeluarkan pada 10 April 2025 disertakan sebagai **Lampiran A**.

Mesyuarat Menteri-Menteri Ekonomi ASEAN (AEM)

8. Berikutan pengenalan tarif oleh Amerika Syarikat termasuk tarif yang diumumkan pada 2 April 2025 dan penggantungan terkini pada 9 April 2025, para Menteri Ekonomi ASEAN mengadakan persidangan video untuk membincangkan perkembangan terkini dan pendekatan bersama ASEAN ke hadapan. Kenyataan Bersama Menteri-Menteri Ekonomi ASEAN mengenai Pengenalan Tarif Unilateral Amerika Syarikat yang telah dikeluarkan pada 10 April 2025 disertakan sebagai **Lampiran B**.

Mesyuarat-Mesyuarat Dua Hala

9. Yang Berhormat Dato Seri Setia Dr. Haji Mohd Amin Liew bin Abdullah mengadakan kunjungan hormat kepada Yang Berhormat Datuk Seri Utama Tengku Zafrul bin Tengku Abdul Aziz, Menteri Pelaburan, Perdagangan dan Industri Malaysia bagi membincangkan hubungan ekonomi dan perdagangan dua hala antara Negara Brunei Darussalam dan Malaysia serta isu-isu semasa yang memberi kesan kepada kerjasama ekonomi dan perdagangan ASEAN. Kedua-dua Menteri menekankan kepentingan kerjasama erat untuk mengurangkan impak tindakan perdagangan dan dalam memajukan pertumbuhan ekonomi bersama.
10. Semasa perbincangan dengan pihak US-ABC, Yang Berhormat Dato Seri Setia Dr. Haji Amin Liew bin Abdullah dan US-ABC, yang diketuai oleh Ambassador Brian McFeeters, *Senior Vice President* dan CEO, meneroka potensi meningkatkan kerjasama dalam sektor kewangan dan digital, berdasarkan platform ASEAN.
